



16. august 2012

UKA 2012/63

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Tasiilami, Illoqqortoormiuni, kiisalu Qaanaami, taaneqartullu nunaqarfiini 2013-miit nannuttassat ataatsimut 60-nik amerlineqarnissaat anguniaqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaqaq Hans Enoksen, Siumut)

Tunnqavilersuut:

Ukioq manna 2012-mi Tasiilami nunaqarfiinilu nannuttassat 25-iupput, Illoqqortoormiuni 35-it kiisalu Qaanaami nunaqarfiinilu 6-it. Ukiuni kingullerni nannunniarneq aallartilaaginnartoq piniartut nannunik pisassaaruttarput tamannalu piniartut assut ilungersuutigisaramikku nannuttassanik amerlanerusunik tunineqarnissartik kissaatigisarpaat. Nunatsinni piniartutut inuussutissarsiuteqarneq inuiaqatigiinni pingaaruteqarluinnartutut inissisimavoq piorsarsimassuserlu aamma eqqarsaatigalu eriagisassaalluni taamaattumik piniartutut inuussutissarsiuteqarneq sutigut tamatigut tapersersortariaqaripput Siumumi isumaqarpugut.

Ajoraluartumik qanoq nanoqartiginera pisortatigoortumik ilisimasaqarfiginngilarput, kisianni piniartut oqalupput nannut sumi tamani assorujussuaq amerleriarsimasut.

Kitaani amerlingaaramik takornartaajunnaarsimapput illoqarfiillu eqqaani takussaagaluttuinnarnerat aamma tamatuminna uppernarsaalluni.

Nannut qanilligaluttuinnarnerat piniartoqarfinni nanoqarfiusuni aamma takornartaajunnaarpoq ilaatigullu aarlerinartorsiorititsisarlutik inoqarfiit tikivittalermatigit allaat illut akornanut pisalerlutik. Ukiorpaalunngortuni nannut piaqqisartut piniaqqusaanngillat tamannalu aamma qularnanngilluinnartumik nunatsinni tamani nannut nanoqarfiusuni amerligaluttuinnarnerinik kinguneqarpoq, taamaattumik tamakku aamma eqqarsaatigalugit siunnersuutigaaara inatsisartunut nannuttassat piniartoqarfinni 60-nik amerlineqarnissaat taperseqqullugu.

Pisortaqarfinni allaffissornikkut aningaasaqarnikkullu sunniutissat:

Tasiilami, Illoqqortoormiuni, kiisalu Qaanaami, taaneqartullu nunaqarfiini nannuttassat ataatsimut 60-nik amerlineqarpata Namminersorlutik Oqartussanut allaffissornikkut saniatigut aningaasartuutaassanngilaq nannuttassiisarneq ukiut tamaasa suliassat naliginnaasut ilagisarmassuk.

Namminersorlutik inuussutissarsiuteqartunut sunniutissat:

Tasiilami, Illoqqortoormiuni, kiisalu Qaanaami, taaneqartullu nunaqarfiini nannuttassat ataatsimut 60-nik amerlineqarpata sumiiffinni pineqartuni piniartut aningaasatigut isertitaqarnerusinnaanerit periarfissanngussaaq nannup amia neqaa kigutai kukiilu piumaneqartuurtuummata.

Innuttaasunut allaffissornikkut aningaasaqarnikkullu sunniutissat:

Aalajangiiffissatut siunnersuutip atuutilersinneqarnerata kingunerisaanik innuttaasut allaffissornikkut suliakkerneqaratillu aningaasartuuteqalernerulernaviannngillat.